
ԴԱՐՁԳԻՐԸ՝ ՈՐՊԵՍ ՀԱՅԵԼԱՅԻՆՈՒԹՅԱՆ ԴՐՄԵՎՈՐՈՒՄ ԼԵԶՎԻ
ԵՎ ԵՐԱԺՇՏՈՒԹՅԱՆ ՆՇԱՆԱՅԻՆ ՀԱՄԱԿԱՐԳԵՐԻ ՄԻՋՈՑՈՎ

ԳՐԻԳՈՐ ՂԱԶԱՐՅԱՆ

Նշանային համակարգերում հայելային կառույցների (*իտ.* strutture a specchio, *անգլ.* specular structures) քննությունն անխուսափելիորեն կապված է համաչափության և անհամաչափության, իրականությունների և դրանց բաժանարար առանցքի, նշանի կրկնելիության խնդիրների հետ: Լեզվաբանության և նշանագիտության բնագավառներում տվյալ ոլորտին են պատկանում լեզվական նշանային համակարգերի ներակա հնարավորությունների, անհատի ինքնության ընկալման, իրականությունների սահմանազատման և երկանդամ հակադրությունների հարցերը, որոնք արտահայտության պլանում որոշակիորեն հարում են ծածկագիտության և թաքնագիտության ոլորտներին:

Սույն հոդվածի նպատակն է ուսումնասիրել, բնութագրել և դասակարգել լեզվի և երաժշտության նշանային համակարգերում հանդիպող հայելային կառույցները՝ մասնավորապես դարձգիրը (պալինդրոմ)՝ առաջադրելով խնդրո առարկա միավորների մեկ ընդհանուր դասակարգում: Այս նպատակով որպես մեկնակետ կվերցնենք հայելային երևույթների՝ մասնավորապես մշակութաբանության, երևութաբանության և նշանագիտության բնագավառներում տեղ գտած ուսումնասիրությունները¹:

Հայելային միավորները լեզվում (օրինակ՝ անգլերեն «BOB» անունը հորիզոնական և ուղղաձիգ կտրվածքներում, հայերեն «Սոս» անունը, «God is light, light is God» կամ «Նա քեզ է սիրում, սիրում է քեզ նա» կառուցվածքային տիպի նախադասությունները հորիզոնական կտրվածքում և այլն) ընթերցման երկու և ավելի հնարավորությունների շնորհիվ անուղղակիորեն խորհրդանշում են միավորի երկակիությունը, ոչ միանշանակ բնույթը, որը հաճախ տրամաբանորեն աղերսվում է երկանդամ հակադրությունների հետ՝ լինել – չլինել, ճշմարիտ – ոչ ճշմարիտ, իրական – անիրական և այլն: Հայելու և հայելայնության նշանագիտական ուսումնասիրությունները, որոնց կենտրոնում իրականության և իրական «ազդակների կրկնօրինակման»² դիտարկումն է

¹ Տե՛ս, օրինակ, **Tagliapietra A.**, La metafora dello specchio, Milano: Feltrinelli 1991, **Eco U.**, Sugli specchi e altri saggi, Milano: Bompiani 1985, **Melchior-Bonnet S.**, Histoire du miroir, Paris: Imago, 1994; «Зеркало. Семиотика зеркальности» [Ред. З. Г. Минц]. Тарту : ТГУ, 1988, և այլն:

² **Eco U.**, Semiotics and the Philosophy of Language, Bloomington: Indiana University Press, 1986, p. 210.

որպես նշանային երևույթ, արժեքավոր են նաև լեզվական նշանային համակարգերում հայելային կառույցները մեկնաբանելու առումով:

Լեզվի հայելային կառույցների շարքում մասնավորապես հիշատակելի են *դյուրադարձուկները* (պալինդրոմ), որոնք հաճախ նշվում են նաև *դարձգիր* եզրույթով: Ընդ որում, փիլիսոփայական հայեցակետից դրանց տրամաբանությունը աղերսվում է մի ուրույն դիալեկտիկական, հարաբերական գաղափարի հետ, այն է՝ որևէ երևույթի երկու՝ միմյանց հակադիր իրացումները կարող են միևնույն արդյունքին հանգեցնել, այսինքն՝ երկու դեպքերում էլ մեկնության (interpretanta-ի՝ մեկնաբանելիի) մակարդակում ստանում ենք նույն արդյունքը: Այս խնդիրն, ըստ էության, փիլիսոփայական-գոյաբանական բազմաթիվ խորհրդածությունների տեղիք է տալիս, գուգորդվելով նաև ֆատալիստական գաղափարների հետ. արդյոք հակոտնյա երևույթները, ինչպես, օրինակ, «լինելն» ու «չլինելը» կարող են միևնույն արդյունքին հանգեցնել, ինչպես դյուրադարձուկի՝ միմյանց հակադիր ընթերցումները:

Չարձգիրը կամ *դյուրադարձուկը*, որպես լեզվի մեջ շրջելիության գաղափարի ներմարմնավորում, հայերենում իր բացատրությունն է գտնում նույնիսկ երևույթի անվանման ստուգաբանությամբ: Շրջելիության և փոփոխելիության գաղափարի շնորհիվ այն մեկնաբանվել է նաև որպես «հեղափոխության քրոնոտոպ»³: Այս համատեքստում հիշատակելի են սկզբի և վերջի միաձուլման, դառնալիության և կրկնելիության խորհրդանիշները, ինչպես գնոստիկական *Ուրոբորոս օձը*, որն ուտում է սեփական պոչը, *խեցգետինը*, որից առաջացել է «խեցգետնաքայլ» կանոնի ձևակերպումը երաժշտագիտության մեջ և այլն:

Միևնույն ժամանակ դարձգրի տրամաբանության մեջ առկա է *կրկնելիության* գաղափարը, ասել է թե՛ մեկ այլ ընթերցմամբ նույն իմաստի վերարտադրման կամ նոր իմաստի փոխանցման, ուստի նաև՝ ուսումնառության հիմքը: Կրկնությունը, որը, ըստ հանրահայտ ասության, «գիտության մայրն է», որոշակիորեն առնչվում է նաև հայելային նեյրոնների հետ, որոնց գործառույթը, ըստ որոշ ուսումնասիրությունների, հնարավոր է դարձնում լեզվի միջոցով աշխարհաճանաչողությունը, ինչպես նաև փոփոխությունն ու առաջընթացը⁴: Լեզվաբանության մեջ կրկնույթ-

³ Գրեբերը «քրոնոտոպ» եզրույթը կիրառում է ժամանակի և տարածության օրինաչափ փոխներգործության և միասնական արտահայտության իմաստով: Նկատենք, որ ռոմանագերմանական և սլավոնական մի շարք լեզուներում «հեղափոխություն» բառը կազմված է *դարձ-*, *ետ-* իմաստակիր նախածանցով. օրինակ՝ անգլերենում՝ «REVO-lution». Greber E., A Chronotope of Revolution: The Palindrome from the Perspective of Cultural Semiotics // The Palindromist 6, 1998 <http://www.realchange.org/pal/semiotic.htm>

⁴ Այսպես կոչված «հայելային նեյրոնների» ժամանակակից ուսումնասիրություններում նմանակման մեխանիզմների ակտիվացումը կապվում է լեզվի ընկալման, ուսումնառության կարողությունների, մտքի տեսության և հաղորդակցության զարգացման հետ (տե՛ս Corballis M. C., Mirror neurons and the evolution of language // Brain & Language 112 (2010), էջ 25–35, www.elsevier.com; Horoufchin H., et al., Action and object words are differentially anchored in the sensory motor system - A perspective on cognitive embodiment, Sci Rep. 2018, <https://www.ncbi.nlm.nih.gov/pmc/articles/PMC5919964/>):

յունը, ասել է թե՛ իրականության կրկնապատկումը, սերտորեն կապվում է նմանակման մեխանիզմների հետ, որոնց վերագրվում է ճանաչողական գործընթացներում նշանների ստեղծման առանցքային գործառույթը⁵:

Երկկողմ ընթերցման հնարավորությունն ինքնին որոշակի ընթացքի և վերադարձի տրամաբանություն է պարունակում, ինչն էլ գուցորդվում է հավերժական շարժման հետ: Այս առումով դարձգիրը բնորոշվել է նաև որպես «հավերժական շարժիչի վաղեմի խորհրդանիշ, ինքն իրեն վերարտադրող և ինքնահոս ուժ»⁶:

Ավանդաբար դարձգիր ստեղծողներին վերագրում էին երգիծաբանի, կյանքի լավն ու վատը շրջող, բարին ու չարը, ընդունելին և անընդունելին միախառնող, դրանք հաճախ տեղերով փոխող անհատի կերպար: Մինևս ժամանակ դարձգիրն ընկալվում էր «աստվածային կարգին հակադրվողի» իմաստով, քանի որ այն ներկայացնում էր «իրական-ճշմարիտի» հակադարձված պատկերը: Եթե հայելու մեջ մարդու աջը երևում է որպես ձախ, իսկ ձախը՝ որպես աջ, ապա նմանապես և դարձգրի միջոցով իրականությունը ներկայանում է հորիզոնական շրջվածքով («vertical flip»): Հորիզոնականությունը պահպանվում է նաև գրի շարույթի գծային կառուցվածքում, որտեղ գործ ունենք շրջվածքի հետ, սակայն հայելայնության երևույթը դիտարկվում է թե՛ հորիզոնական, թե՛ ուղղաձիգ չափումներում: Այստեղ բնականաբար ծագում է **առանցքի** խնդիրը, որին կանդրադառնանք ստորև, սակայն, որպես մեկնակետ, նշենք, որ դարձգրերը հիմնավորապես սիմետրիկ համաչափ կառույցներ են և հակադրվում են «իմաստաստեղծ կառույցներին», որոնց բնորոշ է անհամաչափությունը⁷: Այդ անհամաչափությունը կապված է նախ և առաջ «աջ» և «ձախ» հասկացությունների վերաբերյալ մարդկանց ընկալումների հետ, որոնցից սովորույթի ուժով բխեցվում են մարմնի համապատասխան մասերի և ուղղությունների վերաբերյալ հանրամշակութային, խմբամշակութային և մենամշակութային մակարդակի գնահատականներ: Այսպես օրինակ՝ աջը գուցորդվում է բարու, ճշմարիտի և արդարի, իսկ ձախը՝ չարի, սխալականի և անարդարի հետ:

«Աստվածայինին հակադրվողի» գաղափարն առանձնապես ակներև է երաժշտական տեքստերում հանդիպող **թաքնագրության**՝ այսպես կոչված backmasking-ի դեպքերում, երբ ձայնագրության հետադարձ նվագարկման ժամանակ հնչյունային մակարդակում երևակվում են կասկածելի, թաքնված տեղեկություններ⁸: Ավելին, բանավոր ընթերցմամբ ստացված արդյունքը հաճախ որևէ կապ չի ունենում գրի մա-

⁵ Տե՛ս **Соссиор Ф. де.** Заметки по общей лингвистике. М.: Прогресс, 1990, էջ 157:

⁶ **Greber E. A.,** A Chronotope of Revolution: The Palindrome from the Perspective of Cultural Semiotics // The Palindromist 6, 1998, <http://www.realchange.org/pal/semiotic.htm>

⁷ Տե՛ս **Lotman Y. M.,** Universe of the Mind: A Semiotic Theory of Culture, New York: Tauris & Co, 2001 էջ 78:

⁸ Այսպես կոչված “phonetic reversal”, “backmasked messages” երևույթները, սակայն, դուրս են սույն ուսումնասիրության ուղեծրից:

կարդակի հետ, քանի որ գաղտնագրության խնդրո առարկա դեպքերում երգվող/արտասանվող տեքստն ինքնին դարձգիր չէ: Այնուամենայնիվ, դժվար է հերքել դարձգրի և լեզվի գրային համակարգում ընդունված ուղղությանը հակառակ գրելու/կարդալու միջև հավանական փոխառնչությունը:

Ճանաչողական նյարդաբանության և հոգեբանության մեջ օբյեկտիվ իրականության և երևույթների հակադարձ ընկալումները կապվում են նաև *ձախագրության* (անգլերեն՝ «levography» կամ «sinistrad writing») երևույթի հետ: Իրականության յուրաքանչյուր առարկա կամ բառ ճանաչելիս ուղեղի դոմինանտ կիսագնդում պահպանվում է համապատասխան պատկերը, իսկ ոչ դոմինանտում՝ դրա արտապատկերումը, ինչը ենթադրում է, որ, օրինակ, ձախիկներն այս կամ այն պատճառով աջ ձեռքով գրելիս միննույնն է պահպանում են ձախով գրելու չօգտագործված ներուժն ու կարողությունը⁹: Ասվածը թույլ է տալիս ենթադրել, որ գրի մակարդակում նշանների դեպի աջ և դեպի ձախ դասավորությունը հավասարապես հնարավոր, բնական և ակնկալելի երևույթ է՝ չնայած այն հանգամանքին, որ ձախ ձեռքը, դրա գործածությունն ու ձախիկ լինելն առհասարակ կրոնական և հասարակական պատկերացումներում դարեր շարունակ զուգորդվել են սխալի, չարիքի, բնածին արատի, նույնիսկ լուրջ հիվանդությունների և այլևայլ շեղումների հետ¹⁰:

Այնուամենայնիվ, կրոնական արմատներ ունեցող վերոհիշյալ պատկերացումներն ու կանխակալ կարծիքները գերիշխող էին մինչև անցյալ դարի 50-ական թվականները¹¹: Հայելու, հայելայնության, ձախի և աջի հարաբերականության ու հավասարության փոխառնչություններն այնքան սերտ են, որ ասվածը հիմնավորելու համար բավական է հիշատակել համաշխարհային ճանաչում ունեցող այնպիսի ձախիկների, ինչպիսիք են Լեոնարդո դա Վինչին՝ իր հայտնի «*scrittura a specchio*» հայելագիր գրառումներով և մարդկային մարմնի համաչափության խորհրդանիշ դարձած «Վիտրուվյան մարդ» ստեղծագործությամբ, Լյուիս Քերոլը՝ իր հայտնի «Ալիսը հայելու աշխարհում» ստեղծագործությամբ, և այլն¹²:

Լեզվում հայելային կառույցների ուսումնասիրության մեջ համաչափության խնդիրը դիտարկվում է նշանային համակարգի տառնշանների մակարդակից սկսած: Այսպես, կարելի է առանձնացնել հորիզոնական, ուղղաձիգ, ինչպես նաև միաժամանակ երկու առանցքներում հայելային բնույթ ունեցող նիշեր: Դիտարկենք մի քանի օրինակ:

⁹ Տե՛ս **McIntosh R. D., Della Sala S.**, Mirror-writing, *The Psychologist*. Vol. 25, 2012, էջ 742-747: <https://thepsychologist.bps.org.uk/volume-25/edition-10/mirror-writing>

¹⁰ Տե՛ս **Бертрап П.-М.** Зеркальные люди. История левшей. М., 2016, էջ 73-106:

¹¹ Տե՛ս նույն տեղը, էջ 7:

¹² Տե՛ս նույն տեղը, էջ 226-229:

Հայելային նիշեր	Հայերենի նշանային համակարգ	Լատիներենի նշանային համակարգ
Հորիզոնական առանցքում	Ճ, Ո, Ս	A, M, T, U, V, W, Y
Ուղղաձիգ առանցքում	Հ, Յ	B, C, D, E, K
Երկու առանցքներում	Փ, Օ	H, I, O, X

Այս նիշերը և դրանց հայելայնության սկզբունքով կազմվող միավորները կոչվում են ամբիգրամներ, այն է՝ հորիզոնական կամ ուղղաձիգ հայելու մեջ նույն կերպ ընթերցվող միավորներ¹³: Ընդ որում, ամբիգրամներ առկա են նաև թվանիշերով կազմված կապակցություններում¹⁴:

Դարձգիրը սահմանելիս (*հուն.* պալինդրոմ՝ *πάλιν* – *palin*՝ «ետ, նորից» և *δρόμος* – *dromos*՝ «վազք») անհրաժեշտ է հաշվի առնել դրա արտահայտության և դրսևորման ձևերը ամենատարբեր նշանային համակարգերում և գիտակարգերում՝ լեզվից մինչև երաժշտություն, մաթեմատիկայից մինչև կիբերնետիկա և այլն: Խնդրո առարկա հնարը սովորաբար սահմանվում է որպես թվերի, տառերի կամ նշանային այլ համակարգի միավորներից ստեղծված շարույթ, որի թե՛ ձևից աջ, թե՛ աջից ձախ ընթացումը միևնույն արտահայտությանն ու իմաստային միևնույն արժեքին է հանգում: Օրինակ՝ «քաղաք» բառը, «Մենակ կատակ կանեն» նախադասությունը, մեկ թվանիշով ստացված թվերի քառակուսիները ($1^2=1$, $11^2=121$, $111^2=12321$) և այլն:

Հայտնի է, որ ի տարբերություն դարձգրի՝ *գրաշրջումը* կամ նույնտառիկը (*հուն.* անագրամա՝ *ἀνά* – *aná*՝ «վեր-», «նորից» և *γράμμα* – *grámma*՝ «տառ») բառի տառերի վերադասավորությամբ կազմված մեկ այլ բառ է, օրինակ՝ առած – ծառա, արթուն – Թուրան, անուշ – աշուն և այլն: Հայերենում գրաշրջման եղանակով նոր իմաստ ստանալու երեկվյաթի բացառություններից է, օրինակ, «նավ-վան» գույգը, որտեղ «վան»-ը կրում է նաև «տապան»՝ այսինքն, ըստ էության նույն «նավ» իմաստը (հոգնակին՝ վանք)¹⁵:

Որպես լեզվական միավորների հիշողությունը ներմարմնավորող հնար՝ դարձգիրը հայտնի է եղել դեռևս անհիշելի ժամանակներից: Դրա զարգացումը պայմանավորված էր գրի համակարգի տարածմամբ, երբ սկսվեցին ասելիքի խտացման և ծածկագրման փորձերը, և դարձգիրը սկսեց օգտագործվել առհասարակ որպես բառախաղային հնարք և մասնավորապես պոեզիայում՝ որպես խոսքին միատիկ-գերբնական երանգներ հաղորդելու միջոց: Դարձգրի առաջին կողավորումները վերագրվում

¹³ Տե՛ս **Sorensen R.A.**, A Plenum of Palindromes for Lewis Carroll // *Mind*, New Series, Vol. 109, Oxford University Press, 2000, էջ 17-20:

¹⁴ Տե՛ս **Strobogrammatic numbers**: the same upside down // *The On-Line Encyclopedia of Integer Sequences*, <https://oeis.org/A000787>:

¹⁵ Տե՛ս **Վ. Ուրիշեան**, Մեր արմատները նոր լոյսի տակ, Fresno: Meshag Printing & Publishing, 1998, էջ 198:

են հելլենական դարաշրջանի պոետ, երգիծաբան Սոտադեսին (մ. թ. ա. 3-րդ դար) և բնույթով մետրիկ՝ տաղաչափական դյուրադարձուկներ էին, որոնք հետագայում կոչվեցին *սոտադյան*: Դրանցում իմաստը վերակառուցվում էր երկար և կարճ շեշտերի հաջորդականության շնորհիվ:

Տառացի դարձգրերը (*հուայլ.՝ palindromi letterali*), որոնց հակադարձ ընթերցումը կատարվում է տառ առ տառ, ի հայտ են եկել միջնադարում և համարվում էին գերբնական երևույթ: Դրանց ծագումը շատերի, այդ թվում նաև՝ 5-րդ դարի բուրգունդացի եպիսկոպոս սբ. Միդոնիուս Ապոլլինարիսի կողմից վերագրվում էր անդրաշխարհիկ, դիվային ուժերին: Այս առումով պատահական չէ, որ դարձգրերը հանդիպում են հիմնականում երկու տարածքների սահմանագատման կամ երկու աշխարհների սահմանագիծը խորհրդանշող վայրերում՝ դարպասների և գերեզմանոցների արձանագրություններում: Այդ սահմանները, որտեղ երկրային ուժերը դուրս են գալիս անդրշիրիմյան՝ դժոխային ուժերի դեմ, համարվում են նաև «ուժգնացված նշանային գործառույթան» կետեր¹⁶:

Հասկանալի է, որ սահմանի թեման գուցա հեռաբար հանդիպում է առասպելաբանության և նշանագիտության բնագավառի ուսումնասիրություններում՝ հայելու մասին վերլուծություններում: Հայելին բնորոշվում է որպես սահման տարբեր աշխարհների, ինչպես նաև տարբեր ժամանակակետերի միջև: Հայելային արտացոլքի ուղղաձիգության և հորիզոնականության մասին առասպելաբանության և ազգագրության մեջ հիշատակվում է, օրինակ, առասպելական «Երկնային հայելու» գերբնական հատկությունների համատեքստում: Երկնային հայելուն հեքիաթներում և առասպելներում վերագրվում է անցյալը, ներկան և ապագան մեկտեղելու, մարդու համար դրանք բացահայտելու կարողություն¹⁷:

Որպես հաղորդակցման նշանային համակարգերում հայելու և հայելայնության դրսևորում՝ *դարձգիրը* կրում է հայելու նշանային գործառույթները: Դարձգրերին, ինչպես հայելիներին, հատուկ նշանակություն է վերագրվում հենց երկկողմանի ընթերցման հնարավորության առեղծվածի շնորհիվ: Շարակարգային մակարդակում ընթերցման և ընթերցման միջոցով ժամանակի երկկողմանի ուղղվածություն ենթադրելով՝ դարձգրերը համարվում են ժամանակն ու տարածությունը շրջող, հետևաբար նաև ժամանակը գերազանցող հնարներ¹⁸: Այդ իսկ պատճառով դրանք մեծ տարածում ունեին հմայագործությունների լեզվում և

¹⁶ Տե՛ս **Lotman Y. M.**, *Universe of the Mind: A Semiotic Theory of Culture*, New York: Tauris & Co, 2001, էջ 79:

¹⁷ Տե՛ս **Кусаева З. К.** Семиотика зеркала в фольклорно-этнографической традиции осетин // *Bulletin of the Kalmyk Institute of Humanities of the Russian Academy of Sciences*. Vol. 25, Is. 3, 2016, էջ 64-66:

¹⁸ Տե՛ս **Смирнов И. П.** Художественный смысл и эволюция поэтических систем. М.: Наука, 1977, էջ 125:

հաճախ կոչվում էին նաև «voces mysticae» կամ «voces magicae»¹⁹: Կարծիք կա, որ եթե աջից ձախ ընթերցելն ակտիվացնում է ուղեղի կիսագնդերի ֆունկցիոնալ անհամաչափության (ասիմետրիայի) մեխանիզմները, ապա մշակութային բարձրագույն մակարդակներում հետադարձ ընթերցումը զուգորդվում է առերևույթի և քողարկվածի, հասարակ-աշխարհիկի և սուրբ-էզոթերիկի միջև հակադրության հետ²⁰:

Դարձգրերի տեսակները սահմանազատելու և դասակարգելու անհրաժեշտությունը պայմանավորված է այն հանգամանքով, որ մեկ դարձգրի մեջ հնարավոր է տեսնել մի քանի հնարների համադրում, ինչը նաև տերմինաբանական շփոթմունքի տեղիք է տալիս: Օրինակ՝ մեր թվարկության առաջին դարում գրված «կախարդական քառակուսու» (Sator Arepo Tenet Opera Rotas) մեջ մեկտեղված են սովորական դարձգրի (պալինդրոմ), գրաշրջման (անագրամա) և աքրոստիքոսի հնարները: Մյուս կողմից՝ դրանում հավասարապես համադրված են ընթերցման ոչ թե երկու, այլ չորս ուղղություններ: «SATOR» քառակուսին հանդիպում է հին անգլիական ձեռագրերում՝ որպես կախարդական պաշտպանիչ բանաձև, և հատկանշական է, որ դրա տառերի վերադասավորության գրաշրջման միջոցով ստանում ենք տերունական աղոթքի սկիզբը՝ Pater Noster²¹: Այս փաստից ելնելով՝ արևմուտքի բազմաթիվ երկրներում քառակուսին կիրառվում էր որպես չար ուժերից պաշտպանվելու, Աստծո հովանին և հաջողությունը խնդրելու միջոց, սակայն դրա քրիստոնեական ծագման վերաբերյալ կոնկրետ փաստերին առայժմ փոխարինում են լեզվաբանական-թաքնագիտական տեսությունները²²:

Լեզվաբանության և երաժշտագիտության մեջ դարձգրային երեվույթները անվանվում և դասակարգվում են տարբեր եզրույթների ներքո: Այնուամենայնիվ, գտնում ենք, որ առնվազն վերոհիշյալ երկու նշանային համակարգերի համար հնարավոր է կիրառել ստորև առաջարկվող պարզ դասակարգումը: Նախ և առաջ անհրաժեշտ է հստակ սահմանազատել դարձգիրը (պալինդրոմ) և գրաշրջումը (անագրամա), ապա առանձին սահմանել երրորդ տեսակը, որը, ինչպես ստորև կփորձենք հիմնավորել, չի կարող պարզապես դարձգիր կոչվել:

I. Դարձգիրը նշանային համակարգի նիշերից կազմվող իմաստակիր միավոր է, որը երկու կողմից ընթերցվելիս հանգեցնում է *նույնարժեք* արդյունքի: Հակադարձ շարադրելիս և ընթերցելիս իմաստը պահպանվում է, երբեմն՝ բառակազմական-ձևաբանական միավորների վերախմբավորման միջոցով: Դարձգրի այս տեսակի առանձնահատկությունն այն է, որ միավորի առանցքը մեջտեղում է, ընդ որում, երաժշտա-

¹⁹ Տե՛ս **Blake B. J.**, Secret Language, Oxford: Oxford University Press, 2010, էջ 16:


²⁰ Տե՛ս **Lotman Y. M.**, Universe of the Mind: A Semiotic Theory of Culture, New York: Tauris & Co, 2001, էջ 79-80:

²¹ Տե՛ս **Ивлева М. А.** Вторичное кодирование в древнеанглийском языке (на примере поэтических текстов VII–XII вв.). Автореф. дисс. ... канд. филол. наук. Барнаул, 2012:

²² Տե՛ս **Blake B. J.**, Secret Language, Oxford: Oxford University Press, 2010, էջ 28-30:

կան ձևի մեջ այն ձգտում է մի կետի, որից շարունակվող հակադարձ շարժմամբ և հնչյունների վերադասավորությամբ ստանում ենք *կամար*²³ պատկեր:

Լեզվական դարձգիրը երկու անձի կողմից (միաժամանակ աջից ձախ և ձախից աջ) ընթերցվելու դեպքում չի խաթարի շարույթի տաղաչափական և իմաստային կառուցվածքը. նմանապես և երաժշտական դարձգրի երկկողմանի համընթաց կատարումը չի խաթարի «երաժշտական շարույթի» ներդաշնակ հնչողությունը և միասնական ռիթմիկ ընթացքը:



Երաժշտագիտական գրականության մեջ տվյալ հնարը հաճախ քննարկվում է «*խեցզետնաքայլ իմիտացիա*» կամ «*հայելանման դասավորություն*» ձևակերպումների ներքո²⁴:

Դարձգիրը, անկախ իր երկարությունից, սովորաբար կառուցված է լինում մեկ կենտրոնի շուրջ, և երկու կողմերից կրճատվելիս պահպանվում է համաչափությունը, ուստի և պատկեր-նշանի մակարդակում այն բնական է ներկայացնել *հավասարասրուն եռանկյունու* կամ *կամարի* տեսքով²⁵: Այս տեսակի կառույցները կարելի է ներկայացնել նաև 12321 թվային խորհրդանիշով, որը կրկնում է կամարի տրամաբանությունը, ընդ որում՝ 3-ը համընկնում է առանցքի հետ: Դարձգրային շարույթի 12321 տիպի կառուցվածք հանդիպում է, օրինակ, ավստրիացի կոմպոզիտոր Ալբան Բերգի (1885-1935) «Լուլու» սյուիտի մեջ: Դարձգրի առանցքում հնչում է *ռե բեմոլ մաժորի* եռահնչյունի վրա կառուցված բարդ համադրված ակորդ (արարված II, թիվ 685, տակտ № 3) [Alban Berg, Lulu, Universal Edition A. G., 1985, Wien, p. 512]:

Թե՛ լեզվի, թե՛ երաժշտության մեջ այս տիպի դարձգիրը երկու ուղղություններով ընթերցելիս սկզբնական ձևը և իմաստը ամբողջովին

²³ Երաժշտագիտական գրականության մեջ նշվում է, որ կամարի ֆիգուրը կառուցվում է «երաժշտական շարույթի» միավորների A-B-C-B-A դասավորությամբ: Տե՛ս **Chouiniere Ch.**, Palindromes in Music: Definition & Examples, <https://study.com/academy/lesson/palindromes-in-music-definition-examples.html>

²⁴ Տե՛ս **Riley M.** The Viennese Minor-Key Symphony in the Age of Haydn and Mozart, New York: Oxford University Press, 2014, էջ 106-108:

²⁵ Տե՛ս **Blake B. J.**, Secret Language, Oxford: Oxford University Press, 2010, էջ 16-17:

պահպանվում է: Հետադարձ ընթերցման միջոցով մտքի վերակառուցման ժամանակ պահպանվում է շարույթի կառուցվածքը՝ ի դեմս այն կազմող միավորների հետադարձ հերթական վերադասավորության:

II. Կիսադարձգիր կամ գրաշրջում (անագրամա): Այս տիպի միավորը երկու կողմերից ընթերցելիս ստանում ենք տարբեր, միմյանցից անկախ, սակայն իմաստային առումով հավասարապես ամբողջական արժեքներ, որոնց գումարը մաքուր՝ նույնանիշ դարձգիր է: Ըստ էության *գրաշրջում* կարելի է կոչել թե՛ միավորի նիշերի խառը վերադասավորությամբ կազմված մեկ այլ միավորը (օրինակ՝ «աստ-տաս»), թե՛ նիշերի անփոփոխության պայմաններում հակառակ ընթերցմամբ ստացված միավորը (օրինակ՝ «դրամ-մարդ»): Ըստ Մաքսի Բրուքի՝ առաջին դեպքում, եթե գրաշրջմամբ ստացված բառագույզի ներսում առկա է իմաստային կապ, ապա գործ ունենք անագրամայի հետ, իսկ եթե տառերի խառը վերադասավորությամբ ստացվում է բոլորովին այլ բառ, ապա գործ ունենք «փոխադրման» կամ «փոխատեղման» (“transposal”) հետ²⁶: Այնուամենայնիվ, նմանատիպ բառագույզերը տարբերակելու համար Մարտին Գարդների կողմից 1961 թվականին «պալինդրոմ» բառի շրջվածքով ստեղծվեց գրաշրջման՝ վերը նշված երկրորդ տեսակը բնութագրող «semordnilap» եզրույթը²⁷, որի հետ, ըստ որոշ աղբյուրների, զուգահեռաբար կիրառելի են նաև «շրջելի անագրամա» (reversible anagram, reversal), «կիսադարձգիր» (half-palindrome, semi-palindrome) և այլ եզրույթներ²⁸: Մենք ավելի նպատակահարմար ենք գտնում կիրառել *կիսադարձգիր* ձևը, քանի որ այն բնութագրում է անփոփոխ շրջվածքով միավորը՝ ակնարկելով նաև դրա կիսատ, անավարտ լինելը, ի տարբերություն ամբողջական դարձգրի, որի դեպքում միավորը ենթադրում է որոշակի շարույթի առկայություն: Կիսադարձգրի մեջ համաչափության առանցքը գտնվում է միավորի *ընթերցման ուղղության վերջնակետում*: Այսպես օրինակ, լեզվի մեջ «ծարավ» բառը բնականորեն՝ ձախից աջ ընթերցելու պարագայում կիսադարձգրի առանցքը միավորի աջ կողմում է:

Ըստ էության, կիսադարձգիրը բառային կամ միկրոշարահյուսական միավոր է, որի շրջվածքը նիշերի վերադասավորություն է ենթադրում և անխուսափելիորեն կապված է միավորի իմաստային փոփոխության հետ: Թվային արտահայտությամբ կիսադարձգրի խորհրդանիշ կարելի է համարել, օրինակ, «123» կայուն միավորը, որը հետադարձ ընթերցելիս «արժեքային» իմաստային առումով անկախ, լիարժեք իմաստակիր միավոր ենք ստանում («321»): Ինչպես լեզվի, այնպես էլ երաժշտության մեջ կիսադարձգիրը ենթադրում է հետ-

²⁶ Տե՛ս **Brooke M.**, Anagrams and Transposals: A glossary. Sweeny, Texas 1979, էջ 160:

²⁷ Նույն տեղը, էջ 18:

²⁸ Տե՛ս, օրինակ, <https://theweek.com/articles/464433/palindromes-anagrams-9-other-names-alphabetical-antics>:

ընթաց շարժում՝ վերջին նիշի կրկնությամբ, որը պատկեր-նշանների մակարդակում համապատասխանում է կիսակամարին:



Երաժշտության մեջ կիսադարձգիրը, որպես երաժշտական շարույթի բաղկացուցիչ մաս, պետք է փնտրել հորիզոնական առանցքում, այն է՝ սովի կամ բասի բանալիում առանձին ընթացող *խեցզետնաքայլ շարժման* մեջ, մինչդեռ ուղղաձիգ առանցքում այն կարելի է գտնել *հայելանման իմիտացիայի* մեջ: Տվյալ հնարը համեմատելի է նաև երաժշտական շրջելի կոնտրապունկտի տարրերի հետ: Առավել տարածված է բոլոր ձայների վերադասավորմամբ կազմվող կոնտրապունկտը, որտեղ շարունակությունը կարծես սկզբի հայելային արտացոլքը լինի: Այդ պարագայում պահպանվում է հավասարությունը սկզբնական և ածանցյալ քայլերի ինտերվալների միջև²⁹:

III. Բացի վերոնշյալ երկու հնարներից, որոնց առնչությամբ ուսումնասիրություններ են արվել նաև հայագիտության բնագավառում³⁰, գոյություն ունի նաև դրանց մասնակի նմանությամբ (մասնակիորեն դարձգրի և գրաշրջման տրամաբանությամբ) կառուցվող նախադասության հազվագյուտ մի տեսակ, որը թեև սովորաբար դասվում է այսպես կոչված *երկդիմի դարձգրերի* (*խ.*՝ bifronte, *անգլ.*՝ bifrontal palindrome) շարքին, սակայն վերոնշյալ սահմանումների լույսի ներքո, ինչպես նաև միավորի երկկողմանի ընթերցումների իմաստային փոխլրացման հանգամանքով պայմանավորված, ըստ էության, ո՛չ դարձգիր (պալինդրոմ), ո՛չ էլ կիսադարձգիր (գրաշրջում) համարվել չի կարող:

Դրանք այն նախադասություններն են, որոնց միջոցով արտահայտվող ասելիքը երկկողմ ընթերցման շնորհիվ փոխլրացվում է: Այսինքն՝ հորիզոնական առանցքում նշված տիպի նախադասություններն ավարտուն միտք են ներկայացնում, սակայն դրանք սկզբից մի

²⁹ Տե՛ս «Музыкальный словарь Гроува», перевод с англ. Л. О. Акопяна, М.: Практика 2001, էջ 619; «Обратимый контрапункт» // Энциклопедия. Термины и понятия // <https://www.belcanto.ru/obrkontr.html>:

³⁰ Տե՛ս Վ. Մարգարյան, Հայերենը ափի մեջ. «9-րդ հրաշալիք» հրատ., Եր., 2005: «Խնդրուկ» և «խնդմնդուկ» բառերի մասին, «Ազգ» օրաթերթ, 15.08.2012 <http://www.azg.am/AM/2100010533>

ուղղությամբ, ապա հակառակն ընթերցելիս միավորի իմաստն ավելի ամբողջական է դառնում: Նախադասությունն իր մեջ համադրում է երկու տարբեր իմաստային առումով միմյանց լրացնող շարություններ՝ հակադարձ ծավալածքով: Նշված կառուցվածքը պարզաբանելու համար կարելի է պատկերացնել, որ երևակայական հայելին գտնվում է առաջին ընթերցման ուղղության վերջնակետում:

Ասվածի բացառիկ օրինակներից է լատիներեն «*In girum imus nocte*» նախադասությունը, որը լրացվում է հետադարձ ընթերցմամբ շարադրվող «*et consumimur igni*» բառերով: Վերջինս գրաշրջման տրամաբանությամբ կառուցվող շարույթ է, քանի որ չի կրկնում նախադասության առաջին հատվածի բառերից և ոչ մեկի իմաստը, այլ շարադրվում է դրանց տառերից՝ կետադրության և բացատների վերադասավորման միջոցով:


Դարձգրի այս ենթատեսակն առանձնահատուկ է նրանով, որ դրա հետադարձ ընթերցումը հանգեցնում է ձևաիմաստային առումով ոչ թե նույնարժեք միավորի (ինչպես օրինակ՝ «Մենակ կատակ կանեն») դարձգիր-նախադասության պարագայում է), այլ առաջին ընթերցումից ստացված նախադասության շարունակությանը: Ընդ որում՝ վերջինս, ինչպես արդեն նշվեց, ստեղծվում է գրաշրջման (անագրամայի) սկզբունքով ինքնաբերաբար կազմված բառային միանգամայն նոր միավորների միջոցով:

Այս տեսակի դարձգիրը կազմության առումով հիմնվում է շրջվածքի վրա (обращение), այնուամենայնիվ՝ «շուրջ» արմատի օգտագործումը կարող է շփոթություն առաջացնել, քանի որ այն առկա է նախորդ տեսակի հոմանշային ձև համարվող *գրաշրջում* եզրույթի մեջ: Երկու շարությունների *համադրման երևույթը* որպես տերմինաստեղծման մեկնակետ վերցնելու պարագայում, ձախից աջ և աջից ձախ ընթերցվող նախադասությունների համադրումը հաշվի անելով, տվյալ տեսակի նախադասությունները թերևս կարելի էր անվանել նաև *համադրագիր*, ինչը, սակայն, հղի կլիներ տարբերումներով, քանի որ համադրման երևույթ առկա է նաև ընթերցման ընդամենը մեկ ուղղության մեջ, օրինակ՝ «Նունեն ունենա» և «Նունե, Նունեն ա»:

Էության, կառուցվածքի և արտահայտության առումով խնդրո առարկա տեսակի դարձգիրն ընթերցողի համար առաջին հայացքից անորոշ է և ոչ ակնհայտ, հետևաբար նպատակահարմար ենք գտնում այն անվանել *թաքնադարձգիր*՝ ասվածի մեջ ենթադրելով հունարեն «կրիպտո» (kryptós) (թաքնված, գաղտնի) և «գրամա» (γράφμα) (գիր) արմատները:

Հայերենում որպես թաքնադարձգրի օրինակ կարելի է քննել «*Մեր է նա ուզել < | > լեզու անէրես*» նախադասությունը, որի իմաստն ընկալելի է դառնում, եթե «լեզու» բառն ընդունենք որպես փոխանունություն՝ «խոսող» կամ «մարդ» իմաստով: Մեկ այլ օրինակ է «*Ծարավել ենք նրա սիրո պես < | > սեպ, որի սարն քնել է վարած*» նախադասությունը: Ինչ-

պես այլ լեզուներում, հայերենում ևս թաքնադարձգրի երկրորդ մասը հաճախ խրթին ու արհեստական է հնչում: Վերը նշված երկրորդ օրինակում իմաստը միանշանակ հասկանալի չէ: Նախորդ մտքի հետ կապը կարող է ենթադրություն առաջացնել, թե խոսքը ինչ-որ չափով ծարավի մասին է: Նկատելի է նաև, որ հետադարձ ընթերցման ժամանակ ընթերցողի հայացքը իմաստի դուրսբերման համար որոշ անհրաժեշտ «հարմարեցումների» է դիմում³¹: Մասնավորապես, ծարավել բառի ե-ն ընթերցվում է որպես յոթերորդ «է», իսկ բաղաձայնից առաջ ոչ սովորական «-ն» մասնիկը շարութի բերումով ընկալվում որպես «սար» բառի որոշիչ հոդ: Ուստի, կարելի է ասել, որ դարձգիրը և հատկապես դրա այս երրորդ թաքնված տեսակը ենթադրում է լեզվական միավորների տարբալուծում և նոր միավորների վերաձևավորում: Այնուամենայնիվ, ինչպես լատիներեն *In girum imus nocte* թաքնադարձգիրը, վերոնշյալ օրինակները ևս առաջին ուղղությամբ ընթերցվելիս արդեն ավարտուն միտք են արտահայտում:



Հարկ է նկատել, որ հայելային կառույցները և մասնավորապես դարձգրի խնդրո առարկա տեսակները գոյություն ունեն և կիրառվում են նաև երաժշտական տեքստերում՝ իրենց ուրույն արտահայտությունը գտնելով երաժշտական նշանային համակարգի միջոցով: Այս համատեքստում հավելենք, որ երաժշտության մեջ, ի տարբերություն լեզվական նշանային համակարգով ծավալվող բնականոն խոսքային հաղորդակցության, համադրությունը, այն է՝ երկու և ավելի ձայների համատեղ ընթերցման հնարավորությունը, թույլ է տալիս դարձգրի այս երրորդ տեսակի պարագայում շարույթը երկու ուղղություններով միաժամանակ ընթերցելու միջոցով ստանալ մեկ ներդաշնակ ամբողջություն: Այստեղից ծագում է նաև պատկերը հորիզոնական (մեկ հնգատողի) և ուղղաձիգ (երկու և ավելի հնգատողերի) առանցքներում դիտարկելու հնարավորությունը:

³¹ Այս պատճառով հիշյալ տեսակի դարձգիրը կոչվում է նաև *անհստակ, հնչունային* դարձգիր (неточный, звуковой палиндром): Տե՛ս «Палиндром» // Энциклопедия "Кругосвет" (Универсальная научно-популярная энциклопедия) // https://www.krugosvet.ru/enc/gumanitarnye_nauki/lingvistika/PALINDROM.html

Nr.3 Canones diversi super Thema Regium

Canon 1. a 2. „Canon canonicus“ (Oley)
Allegro moderato

3 Violini
(Cembalo
o Organo
e 2 manuali)

Նոր իմաստի կամ ինչպես վերը նշեցինք՝ «հավելադիր մտքի» ստեղծման առումով խնդրո առարկա հնարները համեմատելի են երաժշտության մեջ *հայելանման ֆուգայի* հետ, որտեղ, ըստ էության, առկա է «շրջվածք, որի արդյունքում ձևավորվում է նոր ֆուգա»³²՝ *նմանակման* (իմիտացիայի) միջոցով:

Ինչպես լեզվի, այնպես էլ երաժշտության մեջ թաքնադարձգիրը երկու կողմերից ընթերցելիս ստանում ենք տարբեր, սակայն միմյանց փոխլրացնող արժեքներ: Շարույթի վերջը նաև մեկ այլ՝ նոր ասելիքի սկիզբ է: Ինչպես բնական լեզուների, այնպես էլ երաժշտության մեջ թաքնադարձգիր տեսակի շարույթի աջից ձախ և ձախից աջ ընթերցումները կարող են անվերջ հաջորդել մեկը մյուսին: Նմանատիպ օրինակ է Յոհան Սեբաստիան Բախի «Canones diversi super Thema Regium, Canon 1. a 2»³³ ստեղծագործությունը: Նկատենք, որ կոմպոզիտորն իր հեղինակած այս կանոնը անվանել է «անվերջ կանոն»՝ ելնելով դրա կառուցվածքի տրամաբանությունից:


Քննարկվող օրինակների թվում հաճախ մեջբերվում է նաև Յոզեֆ Հայդնի 47-րդ սիմֆոնիայի երկրորդ մասը՝ «Minuetto al Roverso», որը, ի դեպ, հաճախ հենց «Palindrome» էլ կոչվում է:

³² Տե՛ս «Музыкальный словарь Гроува», перевод с англ. Л. О. Акопяна, М., Практика 2001, էջ 340:

³³ Տե՛ս J. S. Bach, *Musikalisches Opfer*, Landshoff L. (Ed. by), Edition Peters, Leipzig էջ 8:

Ինչպես երևում է, *սոլ* նոտայով սկսվող և սոլով ավարտվող երաժշտական տեքստը երկու կողմից ընթերցելիս ստանում ենք միևնույն արդյունքը: Այնուամենայնիվ, ամբողջի կեսը (առաջին տասը տակտերը) առանձին վերցրած, թաքնադարձգիր է այնքանով, որ այն հնարավոր է ընթերցել թե՛ ձախից աջ և թե՛ աջից ձախ ու ստանալ տրամաբանված երաժշտական ասելիք:

Երաժշտագիտական խոսույթում դարձգրերի, հայելային կառույցների և խեցգետնաքայլ նմանակման թեմաներին բազմաթիվ անդրադարձներ են կատարվել, այդ թվում նաև հայ դասական երաժշտության օրինակների մեջբերմամբ³⁴: Ընդ որում, *խեցգետնաքայլ կանոն* ասելիս սովորաբար ուշադրության է առնվում երաժշտական շարույթի համաչափությունը հորիզոնական առանցքում, իսկ *հայելայնության* մասին խոսելիս՝ շարույթի համաչափությունը ուղղաձիգ առանցքում: Երաժշտության մեջ *հայելանման իմիտացիայի* պարագայում, առանցքային դերակատարում ունի մետրոռիթմիկ և մեղեդային ուրվագծի լիակատար պահպանումը՝ այն պայմանով, որ այդ մեղեդային դրսևորումը վերարտադրվի հակառակ ուղղությամբ՝ վերընթացը փոխվի վարընթացով, վարընթացը՝ վերընթացով: Հարց է ծագում, թե յոթ աստիճաններից ո՞ր մեկն է լինելու հայելանման իմիտացիայի առանցքային տոնը՝ *համաչափության առանցքը*: Առանցքային տոնը որոշում է հայելանման իմիտացիայի՝ որևէ տոնայնության մեջ գտնվելը. օրինակ՝ եթե հայելանման իմիտացիան շարադրանքի թելադրանքով անհրաժեշտ է կառուցել նույն տոնայնության մեջ, ապա առանցքային տոն պետք է հանդիսանա միայն երրորդ աստիճանը՝ հիմնական եռահնչյունի տերցիան, օրինակ՝ դո մինորում՝ մի բեմոլը: Այս պարագայում աստիճանները կհավասարեցվեն հակընթաց, և դարձգիրը կստացվի:




Թե՛ լեզվի, թե՛ երաժշտության մեջ տվյալ տեսակի շարույթը ենթադրում է նիշերի որոշակի հաջորդականություն, որտեղ դարձգրի էությունը պարզ է դառնում միայն «կրկնապատկման», այն է՝ երկու ուղղություններով ընթերցվելու պարագայում: Այնուամենայնիվ, ինչպես վերը նշվեց, մեկ ուղղությամբ ընթերցվելիս արդեն իսկ ավարտուն, տրամաբանական «նախադասություն» ենք ստանում: 1-ից մինչև 3 թվային նիշերով ստեղծված խորհրդանիշների մեջ այս տեսակի հա-

³⁴ Տե՛ս **Դանիել Երաժիշտ**, Պալինդրոմոն – դարձգիր // Հայ արվեստ 3-4, (21-22), 2007, էջ 38-40:

մար կարելի է ընդունել, օրինակ, «213» պայմանական թիվը, որը շրջելիս միավորի սկզբնական արժեքը (լեզվում՝ սկզբնական իմաստը, երաժշտության մեջ՝ սկզբնական հնչյունային արդյունքը) չի պահպանվում ($213 \neq 312$): Հետադարձ ընթերցման ժամանակ տեղի է ունենում նիշերի վերադասավորություն և միայն կրկնապատկման միջոցով է պարզվում միավորի դարձգիր լինելը ($213+312 = 525$):

Ստացվում է, որ լեզվի և երաժշտության նշանային համակարգերում խնդրո առարկա հնարները մեկ ընդհանուր դասակարգման շրջանակներում կարելի է տարբերակել **ձևաիմաստային բաղադրիչի և համաչափության առանցքի տեսակի** հիման վրա:



Այս համատեքստում անդրադառնալով համաչափության առանցքի խնդրին՝ հարկ է ընդգծել, որ *առանցքը* կարևոր տարբերակիչ հատկանիշ է դարձգրի վերը առանձնացված երկու տեսակների բնորոշման և տարբերակման համար: Մեր վերոնշյալ դասակարգման մեջ օգտագործված թվային խորհրդանիշների մեջ առանցքը *դարձգրի* պարագայում ներկայացված է «3» թվանշանով, մինչդեռ *կիսադարձգրի* և *թաքնադարձգրի* պարագաներում՝ x-y առանցքի «0» կետով: Վերոգրյալի հիման վրա կարելի է ասել, որ *դարձգրի* կառուցվածքում շարույթի առանցքը կենտրոնում է, մինչդեռ *կիսադարձգրի* և *թաքնադարձգրի* պարագայում այն շեղված է դեպի աջ կամ դեպի ձախ՝ կախված շարույթի ընթերցման ուղղությունից (որն իր հերթին պայմանավորված է տվյալ նշանային համակարգի ներակա առանձնահատկություններով): Իմաստի ամբողջացումը հնարավոր է միայն այն պարագայում, եթե առանցքը հայտնվի ընթերցման մեջտեղում:

Միաժամանակ հարկ է նկատել, որ առաջարկվող սույն դասակարգման համաձայն՝ թաքնադարձգրերի շարքին չեն կարող դասվել այն նախադասությունները, որոնք իրենց առանցքում չեն հանգում տրամաբանական դադարի: Թաքնադարձգրի պարագայում միանգամայն հնարավոր է առանցքում վերջակետով ընդհատել շարույթը՝ առանց խաթարելու ասելիքի տրամաբանությունը: Թաքնադարձգիրն իր առանցքում չունի պայմանական «3»-ով ներկայացված որևէ նիշ: Այստեղ «O» առանցքը ներկայացնում է խոսքի այն դադարը, որից հետո շարույթի շրջվածքը սկսվում է վերջին նիշի կրկնությամբ: Բացի այդ, ի տարբերություն *բարդ* համարվող դարձգրերի, որտեղ առանցքը նույնպես անցնում է ոչ թե նիշի վրայով, այլ նիշերի արանքով (այս առումով

քննարկվել է «Я – нем, худ, но | Он – дух меня» օրինակը)³⁵, մեր սահմանած այս տիպի դարձգիրն առանձնանում է նրանով, որ դրա առաջին մասը ոչ թե կիսադարձգիր է, այլ բացարձակ, ավարտուն միտք, որին իմաստային առումով արձագանքում և լրացնում է երկրորդ՝ հակադարձ ընթերցման արդյունքում ստացվող նախադասությունը:

Ընդհանրացնելով վերոգրյալը՝ հանգում ենք մի քանի եզրակացության:

ա. Դարձգիրը, որպես երևույթի մեկնության հայելային գործառույթով օժտված կառույց, գաղափարային առումով ներմարմնավորում է սահմանագատումն *իրականի* ((1) շոշափելի, նյութական, (2) աշխարհիկ (3) ճշմարիտ, բարի) և *անիրականի* ((1) անշոշափելի, ոչ նյութական, (2) անդրաշխարհիկ, տրանսցենդենտալ, (3) սխալ, չար) միջև՝ միննույն ժամանակ ներկայացնելով վերոնշյալ սահմանի գոյության, ինչպես նաև ժամանակի և տարածության շրջելիության գաղափարը: «Իրական-անիրական» հակադրության միասնությամբ (հայելու օրինակի պարագայում՝ այն ինչ երևում է, միննույն իրականի ներկայացումն է շրջվածք-արտացոլքով՝ պարզապես դրա *ան-իրական, ան-շոշափելի* վերարտադրությամբ) դարձգիրը **բովանդակային առումով չի փոփոխում** առարկայի էությունը, թեև որոշակի առումով լրացնում է այն: Լեզվի, ինչպես նաև երաժշտության մեջ այս երևույթը հատկապես նկատվում է թաքնադարձգիր կառույցների միջոցով:

բ. Լեզվի և երաժշտության նշանային համակարգերի խաչմերուկում հնարավոր է առանձնացնել դյուրադարձունքների երեք հիմնական տեսակ՝ դարձգիր (պալինդրոմ), կիսադարձգիր (անագրամա կամ փոխադրում) և թաքնադարձգիր (կրիպտոպալինդրոմ): Վերջինս յուրահատուկ հայելային կառույց է, որի հետադարձ ընթերցումը ոչ թե կրկնում, այլ **լրացնում է առաջին ուղղությամբ ընթերցվող շարույթի միտքը**: Հետևապես, թաքնադարձգիրը տրամաբանորեն ավարտուն միտք է, որի կառուցվածքում սովորաբար առկա են կիսադարձգիր միավորներ: Ընդ որում, թաքնադարձգրի քողարկված էությունը պայմանավորված է նրանով, որ ընթերցողը, հասնելով տրամաբանական հանգուցակետի (լեզվի մեջ՝ վերջակետ, երաժշտության մեջ՝ տակտի գիծ), կարող է արտաքին ձևից ամենին չկռահել, որ «ասելիքի» ամբողջականության համար անհրաժեշտ է կատարել նաև հետընթաց ընթերցում:

գ. Եթե սովորական դարձգրի ամբողջական շարույթի առանցքը համընկնում է մտքի տրամաբանական դադարի հետ, ապա առանցքի աջ և ձախ մասերը, առանձին վերցրած, նույնպես թաքնադարձգրեր են (ինչպես, օրինակ, վերը քննարկված *In girum imus nocte* նախադասությունը կամ Յ. Հայդնի *Minuetto al Roverso*-ի առաջին տասը տակտերը):

Հավելենք նաև, որ դարձգրերի ստեղծումը կապված է մի կողմից ուղեղի աջ և ձախ կիսագնդերի հարաբերական ակտիվության, երկու

³⁵ Տե՛ս «Палиндром» // Энциклопедия "Кругосвет" (Универсальная научно-популярная энциклопедия) // https://www.krugosvet.ru/enc/gumanitarnye_nauki/lingvistika/PALINDROM.html

ուղղություններով գրելու և ընթերցելու կարողության, մյուս կողմից էլ տեքստակազմության համար օգտագործվող նշանային համակարգի ներակա տվյալների և առանձնահատկությունների հետ:

Բանալի բառեր – *դարձգիր, գրաշրջում, համաչափության առանցք, թաքնադարձգիր, երաժշտագիտություն, լեզվաբանություն, դարձգրերի դասակարգում*

ГРИГОР КАЗАРЯН – *Палиндром как проявление зеркальности через знаковые системы языка и музыки.* – Статья посвящена проблеме зеркальности в знаковых системах языка и музыки. В качестве фундаментальной единицы, стоящей в основе зеркальности как понятия и явления, рассматривается палиндром. Дается определение палиндрома с учётом соответствующей теоретической базы лингвистики и музыковедения. Предлагается общая классификация палиндромов на основе семантического компонента и оси симметрии. Впервые вводится понятие криптопалиндрома, который является синтагматической структурой, представляющей собой скрытый палиндром, ракоходное обращение которого не повторяет, а дополняет предыдущее высказывание новым смыслом.

Ключевые слова: *палиндром, анаграмма, ось симметрии, криптопалиндром, музыковедение, лингвистика, классификация палиндромов*

GRIGOR GHAZARYAN – *The Palindrome as a Reflection of Specularity through the Sign Systems of Language and Music.* – The study is devoted to the problem of specularity in the sign systems of language and music. The palindrome is viewed as a fundamental unit of the concept and phenomenon of specularity. The definition of a palindrome is given with due regard to corresponding theoretical bases from Linguistics and Musicology. A general classification of palindromes is proposed on the basis of the semantic component and the axis of symmetry. For the first time, the notion of cryptopalindrome is introduced to define a syntagmatic structure representing a covert palindrome the retrograde movement of which complements the former statement with a new meaning.

Key words: *palindrome, anagram, axis of symmetry, cryptopalindrome, musicology, linguistics, classification of palindromes*

Ներկայացվել է՝ 14.05.2019

Գրախոսվել է՝ 10.09.2019

Ընդունվել է տպագրության՝ 28.11.2019